

Powšitkowne WOZJEWJENJA

njedźelu, 28. junija 2026

Nabožne wusyłanja w serbskim rozhlósu

Ewangelske nabožne wusyłanje w Serbskim rozhlósu MDR ma tutu njedźelu, 28. junija, Serbski superintendent Krystof Rummel z Hodźija. Wotkaz na nabožne wusyłanje w mediatece MDR je pod www.posol.de podaty.

Duchowna hudźba z kapałnikami

Drježdžanscy kapałnicy wuhotuja njedźelu, 28. junija, na předwječoru patronatneho dnja Budyskeje tachantskeje cyrkwy swjateho Pětra, we 18.00 hodź. w Božim domje nyšpor duchowneje hudźby. Tež pónđzelu, 29. junija, na swjedženju swjateju japoštołow Pětra a Pawoła, budže na samsnym městnje pontifikalna Boža mša w 9.00 hodź., kotruž Drježdžanscy kapałnicy wobrubja. Pod nawodom katedralneho kapałneho mištra Christiana J. Bonatha zaklinča wjacehósnje twórby wšelakich epochow. Wšitcy zajimcy su wutrobnje přeprošeni.

Na Marije wopytanja do Róžanta

Na swjedženju Marije wopytanja, štwórtk, 2. julija, su wěriwi ze serbskich wosadow na Božej mši do Róžanta přeprošeni. Kemše w putniskej cyrkwi budu w 9.00 hodź. kaž tež w 19.00 hodź.

Modlenje w Róžeńće

Na modlenje rózowca a před Najswjećišim su wěriwi sobotu, 4. julija, we 18.00 hodź. do Róžeńčanskeje hnadowneje cyrkwy přeprošeni. Pačerje budu w serbskej a němskej rěči spěwane.

Pječ lět Caritas Worklecy

Dnjowa hladarnja Carity „Při Krabatowym puću“ we Worklecach woswjeći sobotu, 4. julija, swoje pjeclětne wobstaće. To chce z hosćimi před domom hladarnje Při zelenišćach 5 činić. Wot 16.00 hodź. zahudži dujerska kapała Horjany a wot 19.00 hodź. přewjedže spěwny kwartet PoŠtyrjoch zjawnu probu. Čělnje derjeměće budže zaručene. Wšitcy zajimcy su wutrobnje přeprošeni.

Změna serbskich kemšow Drježdžanach

Planowana serbskorěčna Boža mša w Drježdžanskej cyrkwi swjateho Antonija na Bünauskej 10 tutu njedźelu, 28. junija, organizatoriskich přičin dla njeje. Wona budže hakle njedźelu, 19. julija, w 16.00 hodź. Přizamknje so bjesada ze swačinu. Wšitcy Drježdžanscy Serbja a jich přećeljo, wosebje tež młodži, su wutrobnje přeprošeni.

Putnikowanje do Krupki

Lětuše putnikowanje młodžiny do Krupki je wot njedźele do pjatka, 26. do 31. julija. Putniske kemše w Krupce budu srjedu, 29. julija, w 10.00 hodź. Štóž chcył kemši z busom sobu jěć, měł so w Radworskim Šmitec-Schwarzec wozydłownistwje přizjewić, telefonowe čisło (03 59 35) 28 60.

Wulět dekanatnje młodžiny

Serbska dekanatna młodžina je tež lětsa na zhromadny wulět přeprašena, kotryž budže njedzeli, 13. septembra. Přeprašeni su tohorunja młodostni wot přichodneho 9. lětnika. Planowane je z busom do Sprjowjow (Sprey) pola Hamora jěć, hdžež budže zhromadny nyšpor w tamnišej cyrkwi. Přizamknje so čotnikowanje z Čelna do Noweho města/Sprjewja. Tam wulět z grilowanjom wuklinči. Wotjězd busow budže w 12.00 hodź., mjez druhim z Kulowa kaž tež Chróscic a potom wotpowědnje přizjewjenjow po wsach. Młodostni nawróća so wokoło 19.30 hodź. Přinošk wučinja na wobdźělnika 25,00 eurow, čłonojo serbskeho dekanatneho kružka kaž tež wobsedźerjo karty JULEICA płaća pjeć eurow. Zajimcy měli so hač do póněžele, 10. awgusta, online přizjewić. Link je pod www.posol.de wozjewjeny.

serbska super-app

Serbskich digitalnych poskitkow je wjele. Kotre pak scyła wužiwamy? A kotre poskitki a funkcije hač do džensnišeho pobrachuja? K tomu je Beno Brězan w nadawku Załožby za serbski lud krótke naprašowanje přihotował. Zaměr je, zo mnozy swoje mysle za přichod serbskich digitalnych poskitkow zapletu. Přenja składnosć za to je, na prašenja w naprašniku wotmołwić. Wotkaz na naprašnik namaka so pod www.posol.de. Mjez wšitkimi wobdźělnikami wulosuja so tři dobropisy po 50, 30 a 20 eurach za Sundownerowu baru w Budyšinje.

Swjedźenski dzeń we Vilémovje ze serbskim podžělom

W sewjeročeskim Vilémovje (Wölmsdorf) spominaja lětsa na 300. róčnicu poswjećenja tamnišeje cyrkwe Marije donjebjeswzaća. Tole kaž tež 200lětnu wobstaće putnikowanja k swjatnicy, kiž měješe sčasami wobšěrny serbski podžěl, chcedža na swjedženju Marije donjebjeswzaća, sobotu, 15. awgusta, wopominać. Wosebje Łužiscy Serbjaj su na to wutrobnje přeprašeni. W zhromadnym džěle z Budyskim Serbskim muzejom pokazaja wustajeńcy „Prjedy hač woteńdžeš“ a „PRISMA. Žiwjenje při Klósterskej wodze.“ Wjeršk swjatočnosćow budže putniska Boža mša w 17.00 hodź. Hłowny celebrant budže Praski arcybiskop Stanislav Přibyl. Cyrkwinski chór Vilémova za tutu składnosć tež serbske kěrlušy přihotuje.

Přihotuja nowy duchowny oratorij

Chór Lipa pod nawodom Jadwigi Kaulfürstoweje je proby za nowy serbski duchowny oratorij z titulom „Znamjenja a dźiwy Jězusa“ zahajił. Hudźbu za chór a orchester je Feliks Brojer w nadawku chóra Lipa składnostnje 120. róčnicy založenja Lipy Serbskeje w léće 1907 skomponował. Tekst napisa Fabian Kaulfürst. Planowanej stej dvě předstajeni w Chróšćanskej wosadneje cyrkwi, a to sobotu a njedzeli, 17. a 18. apryla 2027. Nadrobniše informacije so hišće wozjewja.

Zhromadne dny za žony

Za koho abo što sym poprawom w žiwjenju po puću? Z tutym prašenjom, ale tež ze swójskim pytanjom za žiwjenskimi slědami móža so zajimče na zhromadnych dnjach za žony zaběrać, na kotraž přeprašuje Drježdžansko-Mišnjanske biskopstwo. Wone budu wot pjatka do njedzeli, 4. do 6. septembra, w swójbny a dowolowym domje swjateje Wórše w Struppenje pola Naundorfa w Sakskej Šwicy. Linkaj k nadrobnišim informacijam kaž tež k přizjewjenju stej pod www.posol.de podatej.